

Despues cu no a haya reaccion di minister

Ayera trahadornan di Biblioteca na Playa a drenta accion atrobe



ORANJESTAD – Trahadonan di Biblioteca un biaha mas a bay den accion di protesta mirando cu ainda ningun hende a duna nan oido, particularmente e minister di Enseñansa Arthur Dowers. Segun e presidente di sindicato SEPPA cu ta representa e trahadonan, esta Magaly Brito, no tin un reaccion

di e mandatario (gobernante) cu ta pone cu e trahadonan ta sigui para pafor. Como tal mescos cu un dia prome, ayera e trahadonan a muestra nan mal contento y a welga 3 ora mainta te cu merdia. Y si no tin cambio, lo a intensifica e accionnan den curso di awe. Pa mas informacion lesa pagina 2.

Despues cu no a haya reaccion di minister

Ayera trahadornan di Biblioteca na Playa a drenta accion atrobe

ORANJESTAD – Trahadonan di Biblioteek un biaha mas a drenta den un accion di protesta mirando cu ainda ningun hende a duna nan oido, particularmente e minister di Enseñansa Arthur Dowers. Segun e presidente di sindicato SEPPA cu ta representa e trahadonan esta Magaly Brito, no tin un reaccion di e mandatario (gobernante) cu ta pone cu e trahadonan ta sigui para pafor. Como tal mescos cu un dia prome, ayera e trahadonan a muestra nan mal contento y a welga 3 ora ayera mainta te cu merdia. Y si no tin cambio, lo a intensifica e accionan den curso di awe.

Segun sindicato, manera cu e gobierno nobo a sinta 6 luna pasa, nan a sinta riba e topico aki y e aña aki tin diferente correspondencia riba e topico aki. Tabatin diferente yobida y problema unda cu e sindicato a sigui insisti cada biaha cu e situacion ta bira pio cada bes cu yobe. E ta un peliger pa e trahado y tambe pa e clientenan, pe usuarionan esta e hobenan estudiantil. “Como tal nos a pidi atencion pa e problema” segun Magaly Brito a laga sa ayera mainta na e matutino aki durante e welga.

Mirando cu no tabatin ningun reaccion di parti di e gobernantenan, ayera a dicidi cu nan ta bolbe drenta den accion di protesta. E hecho cu e mandatario ta bisa cu no ta e ta esun cu por drecha e problema sino mas bien e director cu lo no a informe di e problemanan, no ta e caso segun e sindicato. “Nos

por para culpa te hasta e gobierno anterior y te hasta ta e directora mes” Brito ta bisa. Pero e realidad ta cu no por core cune y cu e realidad ta cu e edificio ta den un situacion hopi deplorabel. Plafond ta cai, y awa ta core den henter e edificio. Kabelnan cu ta core sali for di den laira, tin problema cu coriente y mucho mas. E problema tey.

“Como minister encarga cu biblioteek e ta keda responsabel pa e salud y bienestar di e trahadonan” segun Brito. Si esaki tin cu wordo atendi sea cu e minister di infraestructura of otro minister, esey ta un responsabilidad di e mandatario y cu e tin cu haci. No core tira culpa riba ningun otro persona of instancia pasobra sino e problema ta keda eynan. E trahadonan lo keda den accion di protesta locual tampoco ta bon, pasobra nan ta dispuesto pa traha.

A haya nan den situacionnan anterior asina cu a dura lunanan largo cu trahadonan ta riba caya. Y awor tin sentencia di hues cu ta muestra cu gobierno ta responsabel pa duna e trahadonan un lugar di trabou cu ta adecua y tambe e obligaon pa percura pa e salud y bienestar di e hendenan unda cu nan ta labora. E hecho cu minister ta bisa cu e trahadonan ta batiendo riba porta robes, y critica cada bes ora cu tin un problema, no ta berdad. Ta papiando di un problema serio di henter un edificio y Dowers ta e minister responsabel di biblioteek. Como tal dificilmente e trahadonan por bai reclama na minister di asuntonan social of na otro ministernan di e.o. salubridad. Tin cu reclama



na e minister cu ta e minister directo. Ministernan semper ta pura pa e departamento tuma medida pero ora cu ta actua no ta haci esaki.

Pa e trahadonan bai traha, nan ta exige un plan di accion di e minister, di con e ta bai atende cu e problemanan cu tin aworaki na biblioteca. Si esaki tin cu bin di parti di e directora, tambe ta bon basta

tin un garantia di parti di gobierno cu lo tin bienestar pa e trahadonan na biblioteca.

E hecho cu ta reclama cu no ta awor cos a dañá, ta berdad segun Brito. E mester tin un tempo hopi largo cu e problemanan a surgi. A drecha algo aki aya, unda cu a patch up problemanan chikito. Pero e cuadro full no a keda atendi.

Awor ta asina cu di tanto patch up, a pone cu gran parti di e edificio (1/3) no ta den estado pa bai traha aden. A duna oportunidad na minister pa reacciona prome cu merdia kico ta bai pasa. Ta dispuesto pa bai sinta na mesa y discuti e problema. No sa cuanto tempo ta bai ta pa drecha e problema y hacie adecua pa trahadonan por bai traha bek.

Minister di enseñansa Arthur Dowers ta reacciona riba accion di ayera

No por ta asina cu pa falta di airco dañ, personal di Biblioteca di Aruba ta bai para pafo

Si departamentonan concerni no haci nan trabou no por culpa minister



Minister di enseñansa Arthur Dowers

ORANJESTAD – No por ta asina cu pa falta di un airco of mas cu no ta traha, personal di biblioteek di Aruba ta bai para pafo. Esaki ta prome reaccion di e mandatario di enseñansa Arthur Dowers riba e accion di diamars ultimo di e trahadonan di biblioteek. Esey ta sin sa cu nan lo a bai den un accion ayera mainta atrobe. Di tur forma, e mandatario ta muestra cu no por responsabilisa e mandatario sin mas y ta haya cu e loke cu e trahadonan ta haciendo no ta cuadra cu e miho forma di proceder.

El a muestra tambe cu el a solicita presencia di e directora di biblioteek Astrid Britten indicando cu e kier sa di dje y haya 'tekt en uitleg' di e situacion cu tin na biblioteca. Pa loke ta e supuesto promesa cu a wordo haci na e trahadonan cu no a haya oido di parti di minister no ta berdad segun Dowers. Tambe e sindicato ta mal informa riba

e asuntonan. Esey pasobra den principio ta e director ta esun responsabel pa biblioteca. A sinta algun siman cu e mandatario caminda a haya un bista riba e situacion.

Aki e director a manda tur carta concerni pa e mandatario cu na su turno a manda esaki pa e departamentonan concerni. Esaki ta pues departamento di DIP y como cu nan no ta cai bou di responsabilidad di e mandatario di enseñansa, ta hopi dificil pa e por dreña den DIP y bisa hendenan kico nan tin cu haci of e mes como minister cuminsa drecha e airconan dañ. "Mi no ta drechado di airco pues bo no por spera cu mi mes tin cu bai sali bai" Dowers a bisa.

Loke tin cu pasa segun e mandatario ta cu e departamento di biblioteca tin cu cana su caminda pa e cosnan pasa. E ta lamenta cu hendenan ta sali protesta, perhudicando por ta e grupo cu nan ta traha pe sin tene cuenta

cu e forma ei no ta soluciona nada. E problemanan tin cu wordo soluciona door di dept di gobierno. Tin un burocracia tremendo cu absolutamente nada no ta tuma lugar. Un bon ehempel ta cuerpo policial na San Nicolas unda cu pa añanan airconan no tabata funcion. Pero aki e polisnan no a bai para pafo pa protesta, segun Dowers.

Aki e mes a experiencia e dolor di cabes pa haya cosnan drecha. Na final ta bin resulta

cu e cosnan ta keda drumi na departamento. Pero no tin sentido pa bai para pafo sino cu tin cu haci follow up como esun responsabel pa e departamento pa cosnan tuma lugar. Berdad cu tin bes ta necesario cu e ministernan mester bin den pantaya pa cosnan cana. "Pero si DIP no ta traha, mester haya splicacion di director di biblioteca kico tur e la haci pa DIP yega eyan y dicon DIP no a yega.

No mester di ta asina cu

un minister mester bin den pantaya pa un airco wordo drecha segun e mandatario. "Imaginabo cu cada bes cu un airco of un bentana, un schamier kibra na un departamento, cu ta un minister mester sali bai percura pa e drecha" Dowers a bisa. Ta e departamentonan tin cu haci esaki y tin cu mira si e diensnan ta funciona. "Bo no ta haya e solucion ei door di para pafo di biblioteca" Dowers ta sigui bisa finalmente.

Minister Arthur Dowers ta puntra

Pakico no a protesta tur e añanan ora cu tabatin problema caba cu Biblioteca di Playa?

Problema di Biblioteca no a sosode den e ultimo 6 luna sino añanan anterior



Minister Arthur Dowers

ORANJESTAD – E problema di Biblioteca na Playa no ta algo nobo sino di hopi aña. Ta bisto cu ultimo añanan e Biblioteca no a wordo renoba. Pero no ta gana

cu para pafo si Biblioteca tin un buraco den e dak. Esun cu tin cu actua no ta haciendo esaki. Hopi aña esey tabata asina na varios edificio di gobierno. Y ora cu ta haci

hopi nombracion politico na departamentonan, ta stroba cu bo no por inverti den e edificionan. Enbes di haci fabor politico den dienst, bo no ta pone placa acerca pa drecha e edificio segun e mandatario di enseñansa. E mesun hendenan cu a wordo nombra door di otro politico ta bai para riba caya protesta. Nan tin cu compronde cu un compania mester ta den balansa. E reparticion di cuanto ta inverti den edificio, of den ser humano ta hopi dwars segun e mandatario di enseñansa. Mester yega na un balansa den esaki y ta importante cu para pafo dilanti biblioteca

no ta drecha e buraco den e dak di e edificio.

Si sindicato para ariba cu nan kier papia cu e mandatario y cu tanten cu esey no sosode, no ta bai traha, tampoco no ta bon. A papia regularmente cu e sindicato y como tal esey no ta e asunto. Sindicato tampoco no por drecha e problemanan na e edificio. Y si ta e sindicato a pone e trahadonan pafo, anto ta e sindicato mester paga pa e consecucionan cu esaki por tin. Entre otro a haci mencion cu mester evalua e concepto di no work no pay, aunke cu esaki mester bin di e director mes.

Si bo no traha, bo no por cobra segun e mandatario. E director tin cu yega na esaki y duna e conseho kico tin cu sosode. Na final di dia, si bo no traha bo ta cobra segun e mandatario. E director ta responsabel pa e asuntonan den e proceso di organisacion di e departamento. Si esey no funciona, mester percura pa e otro departamentonan traha corecto. Pero no por ta asina cu sin adverti cu tin un problema cu a buta cu no por traha mas, ta bai para pafor.

Si tin un oficina cu tin un airco cu a cai y cu a bira

mucho calor, bo no por spera cu e trahadonan bai den e oficina. Pero mester pensa e ora cu ta sera e oficina ey y ta bai traha otro caminda segun minister Dowers ta sugeri. Pero gewoon bai para pafo no ta soluciona e problema. Si tin un problema cu a presenta mester bai solucione y no bai protesta. Si un auto di polis daña pafo, e polisnan no por bai para riba caya protesta pasobra esey no ta resolve e problema segun Dowers. Mester manda e auto na un mecanico pa wordo drecha.

A compronde cu pa añanan largo e directora di e biblioteca a pidi ayudo di gobierno anterior pero no a haya e atencion necesario, pero e tempo ey nunca e trahadonan a bai para pafo. Y di repente si. No ta culpando gobernacion anterior pasobra gobernacion ta un continuacion. Pero si tabatin un minister diferente pa un periodo largo prome cu e ultimo 6 lunanan, cu no a haci nada riba e asunto aki. “Biblioteek no a cai den otro ultimo 6 luna, y no tabatin problema cu esey a tuma lugar ultimo lunanan sino mas bien añanan largo. Tin hopi biaha tabatin problema cu no tabatin manifestacion pafo. Pakico awor si tin manifestacion prome. Algo cu e minister kier contesta for di e director.